

**Igeriketa** ♦ Erabakigarria izango da 50 metro bizkarkako proba

# Inoiz baino parte-hartze hobia Donostia Hirian

*Larunbatean jokatu da Easok antolatutako proba, Europako egutegian izen ona hartzea duela erronka*

Xabin Makazaga / Donostia

LUXUZKO parte-hartzea izango du Donostia Hiria igeriketa probaren seigarren aldiak. Easo klubak antolatuta, larunbatean jokatu da mitina, 10:00etatik 19:00etara, Anoetako Paco Yoldi igerilekuan. Atzo egin zuten aurkezpena, eta probak Espainiako Estatu hartu duen izen onagatik «harrituta» agertu zen Jose Alonso, Easo igeriketa elkarte presidentea: «Espainian sona hartu du Donostia Hiria probak, eta puntako taldeak beren kabuz jarri dira gurekin harremanetan, etorri egin nahi zutelako. Harritu egin gaitu horrek ere».

Canoe, Sabadell eta Metropoleko igerilari onentsuenak lehiatuko dira Donostian, besteak beste. Mailaz, Easok antolatutako mitina «Espainiako Opena» datekeela esan zuen Alonsok, «txapeldun izan diren 10-12 igerilari lehiatuko baitira Donostian».

EEBBetako bi talde ere izango dira Donostian, maila onekoak: American University Team eta Curl-Burke Club. Easoko igerilari Junkal Irigoienek eginiko harremanek horretan zerikusia izan dutela nabarmendu zuen Easoko presidentek.

Parte-hartzaileen artean, gizonezkoetan, Frank Byskop daniarra, Adam Bruns eta Mark Liscinsky estatu batuarak eta Ismael Garcia, Santiago Castellanos, Pablo Artime eta Ivan Agirre dira aipagarri; emakumezkoetan, berriz, Sina Lindman eta Kim von During alemaniarak dira maila onenekoak, Sarai Juste, Vanesa Rojo, Elisenda Perez eta Rosario Zazorekin. Junkal Irigoien donostiarra —hiru aldiz garaile Donostia Hirian— eta Ane Saseta irundarra ere onenen pare lehiatzeko moduan dira, garaipena zail antzekoa duten arren.

Donostia Hiria mitinak «gutxi barru» Europan sona handia izango duela iragarri zuen Jose Alonsok, eta Easo klubaren erronka horixe dela nabarmendu: «Europako Ligan sartuta dago gure pro-



PABLO S. QUIZA

Easoko Igeriketa Elkarteko presidente Jose Alonso eta Donostiako Udaleko Kiroletako zinegotzi Ramon Gomez, atzo, prentsaurrekoan.

ba, eta gero eta maila hobia izatea da asmoa. Ahalegin handia ari gara egiten».

## 50 metro bizkarkako proba, erabakigarria

Alemaniano taularen bidez erabakiko dira Donostia Hiria mitineko irabazleak, gizonezkoetan eta emakumezkoetan. Aro olinpiko bakoitzean taula hori egokitu egiten dela azaldu zuen Easoko presidentek, eta azken aldaketek bizkarkako probei «mesede» egin dietela. Horregatik, eta proba bakoitzeko parte-hartzaileen

maila aintzat hartuta, Donostia Hiriko irabazleak 50 metro bizkarkako saioetan izango direla erantsi zuen. «Hala ere, mailaz onena 50 metro libreetako saioa izango da agian, Mark Liscinsky oso marka ona baitu igerileku luzean: 23.63. Horren bultzatzen bada, irabazteko gai ere izan liteke».

Donostiako Hiriak sei milioi pezetako aurrekontua du, eta Easok lau milioi lortu ditu diru-laguntza eta babesle bidez. «Bi milioi pezetako kostua izango du mitinak klubarentzat», esan zuen Alonsok.

## Jivanevskai, datorren urterako

**N**INA JIVANEVSKAIA Donostiara ekartzeko ahal izan duen guztia egin du Easo klubak, baina, Europako 50 metro bizkarkako txapeldunak hasieran baietz esan arren, hegaldi egokirik ezin topatu izanak galarazi du hark parte hartzea. Izan ere, Munduko Kopan lehen postuan dago Jivanevskai, eta Donostiako probaren biharamunean beste proba bat jokatzea da.

«Malagatik zuzeneko hegaldi bat izanez gero etorriko zela esan zidan, baina ezinezkoa izan da. Interea zuen Donostian izateko, eta ziur nago datorren urtean hemen izango dugula», esan zuen Jose Alonsok. Jivanevskiak Munduko errekorra ontzeko aukera ere bazuela erantsi zuen Easoko presidentek: «150.000 pezeta aurreztu ditugu behintzat», esan zuen, ironikoki.

## laburrean

### RALLYAK

■ **Dakar-Kairoko gidari eta ibilgailuak Libiara lekualdatu dituzte, atentatu arriskuagatik, Niger saihestuta**

NIGER saihestu eta, han egitekoak ziren lau etapak atentatu arriskuagatik bertan behera utzi ondoren, datorren astean jarraituko du Dakar-Kairo rallyak. Atzo lekualdatu zituzten rallyko gidari eta ibilgailuak, Nigerko hiriburutik Libiara, hegazkinez.

### OLINPISMOA

■ **Gaur jarriko da abian Dopinaren aurkako Nazioarteko Agentzia**

AURRENEKO bilera egingo du gaur Dopinaren aurkako Nazioarteko Agentziak, Lausanan, NBOn egoitza nagusian. EEBBek ere bertan parte hartzea erabaki dute, «drogarik gabeko lehia bultzatzeko lagungarri» delakoan. NBOn presidenteorde Richard Pound izango da Agentziako presidentea.

### TXIRRINDULARITZA

■ **Rooks, Winnen eta Ducrot ez dira agertu Holandako Federazioan deklaratzera**

STEVEN ROOKS, Peter Winnen eta Maarten Ducrot deklaratzera deitu zituen Holandako Txirrindularitza Federazioak, 80ko hamarkadan dopatu egin zirela onartu eta Holandan dopina bultzatu zuen sare bat egon zela salatu zutelako. Atzo zuten hitzordua, baina ez ziren agertu.

### SASKIBALOI

■ **Majerleren hirukoek lidergoan sendotu dute Miami Heat, NBA**

MIAMI HEAT gero eta sendago ageri da Atlantic Divisioneko lidergoan, Minnesotari 106-119 irabazita. NBAko azken jardunaldian Dan Majerle izan zen izarra, 33 puntu lortu baitzituen, hiruko 10 jaurtiketatik 9 sartuz. Beste emaitzak: New York 95, Chicago 88; Seattle 101, Phoenix 88; Golden State 102, Dallas 109; Washington 117, Toronto 89; Sacramento 110, Houston 93. Bestalde, Bobby Phills, Charlotteko basea, auto istripuz hil zen, atzo, eta Chicagoren aurka gaur zuten partidua bertan behera utzi dute.

## Pilota ♦

## Ezkurra eta Imaz txapeldunak, Galarretako partidu nagusian

*Garikoitz Altuna eta Iñaki Lizaso izango dituzte kontrario*

E. Telleria / Donostia

DONEZTEBEKO erremontelariak sendo dabilta azkenaldian. Ezkurra txapeldunak Jose Jabier Etxeberria herrikidearekin jokatu eta irabazi zuen herenegun —Euskalen izan zen, Altuna II.a-Etxabe txapeldunordeen kontra (40-37)—, eta beste doneztebar bat izango du gaur kontrario, Iñaki Lizaso. Lizasoren laguna Garikoitz Altuna izango da. Azkena Ezkurraren kontra jokatu dituen partidua galdu egin ditu Amezetako aurrelariak —Errege egunean Etxaberekin finalaren bigarren errebantxa, eta herengun berriro Etxaberekin Euskalen—. Horren ordaina hartzekotan dabil Garikoitz. Lizaso lagun egokia izan daiteke horretarako.

## Oscar Insausti, Deportivon

Garma lagun hartuta, Unda I.a eta Rekalderen kontra jokatuko du Oscar Insausti txapeldunak Eusko Basquek gaurko Bilbon antolatu duen partidu nagusia. Estelar polita da. Insaustik Garmarekin jokatu zuen azkena ere, Sanchez eta Rekalderen kontra, joan den larunbatean, eta galdu egin zuen (34-45).

### gaurko partiduak

#### GALARRETA. 16:00.

- Berziartua-Urko / Zalakain-Zestau III.a
- Ezkurra-Imaz / Altuna II.a-Lizaso
- Iñigo-Iriarte / Altuna I.a-Aizpuru
- Sarasua-Zandio / Bitoria-Amenabar.

#### DEPORTIVO. 17:00.

- Zeberio-Ziskar I.a / Zabaltza-Leunda
- Insausti-Garma / Unda I.a-Rekalde
- Ziskar II.a-Torre / Daniel-Garrido.

### larunbateko partiduak

#### BERGARA. 16:30.

- Gorostiza-Pinedo / Arbizu-Galarza IV.a
- Eskuz Binkako Txapelketa Profesionala: Nagore-Errandonea / Unanue-Erasti
- Salaberria-Imaz / Koka-Taberna.

#### SARTAGUDA. 17:00.

- Atxa-Iparragirre / Martinez-Errandonea
- Eskuz Binkako Txapelketa Profesionala: Eugi-Gofi III.a / Titi III.a-Lasa III.a.

#### LA PUEBLA DE LABARKA. 18:30.

- Bigarren mailakoan aritzeko kanporaketa: Lejardi-Bazeta / Telleria-Oregi I.a.

#### DEPORTIVO. 17:00.

- Egibar-Fernando / Zeberio-Ibarra
- Sanchez-Juan Pablo / Urkia-Rekalde
- Unda I.a-Gorostiaga / Ziskar II.a-Garrido.